

Historia ed origin dall'uniun per la tgira dalla cuntrada e per la cultivaziun dalla pumera Trin



L'uniun ei vegnida fundada ils 9 d'avrel 1996 cun igl intent da segirar persistentamein fauna e flora el territori urbanisau e nunurbanisau dalla vischnaunca da Trin. A caschun dalla radunanza constitutiva havein nus astgau surprender la cassa dall'antieriura uniun per la pumicultura da Trin.

Enteifer igl emprem onn ei vegniu realisau in project, il qual cunteneva la protecziun della spunda unica dalla cuntrada situada encunter sid denter Trin e Digg, sco era il manteniment dils praus maghers, dalla pumera e da seivs vivas sco premissa per ina flora e fauna multifara. Il Fondo Cuntrada Svizra (FCS) haveva susteniu quei project cun contribuziuns finanzialas.

La spunda situada encunter sid denter Trin e Digg che vegneva pli baul schuada, ei caracterisada entra tschiens da pumera cun best ault. Sin la pumera madiran meila, péra, tschereschas, zuescas, palogas, cudugns ed era nuschs. Il terren selai cultivar sco prau ni sco pastira, antruras era sco èr da garnezi, quei denton buca cun fetg gronda racolta. Cheu existan aunc numerosas specias raras d'animals e da plontas, las qualas ein s'adattadas a quei - entra l'influenza dil favugn - fetg migeivel liug, che ein denton era dependentas dalla cultivaziun tradiziunala. Quella cuntrada miez aviarta ei specialmein reha da differentas specias d'utschals.

Entras quei Project han ins saviu realisar cuors da tagliar pumera, per cultivar seivs vivas e per construir mirs schetgs. Plinavon eis ei stau pusseivel da plantar bia pumera cun best ault e da cumprar in fuorn per torrer puma.

Igl onn 2003 ei quei project vegnius remplazzaus entra in concept da reit, realisaus dil cantun, che cumpeglia era las vischnauncas cunfinontas.

Commembers/commembras dall'uniun ein actualmein 36 persunas singulas, 39 famiglias, l'Uniun da traffic Trin ed il menaschi „Project uaul da muntogna“.

Activitads

Mintg'onn vegnan organisadas excursiuns tier uniuns vischinontas, tier tematicas sco protecziun dallas miez miur e miez utschi, protecziun dalla cuntrada, differentas occurrentzas d'informaziun sco p.ex. sur dalla calamitad dils coss, sur d'utschals indigens, sur d'orchideas, sur da nossa geologia particulara (bova da Flem, ruttadira inversa principala Glarunesa, Ruinaulta), sur da micro-organissemms efficients, sur dil compostar etc.

Permess che avunda puma ei madirada, vegn quella raccoltada dalla pumera nuncultivada e fatg must ordlunder a Scharons. La scola primara organisescha mintga dus onns in gi da meila, nua che scolars e scolaras rimnan sez la puma e cuschinan en scola in bun gentar. Alla fiera da Trin (mintgamai la davosa sonda d'october) ei l'uniun mintg'onn presenta cun in stan d'informaziuns e cun delicatessas sco paun cun péra, pettas da meila ni cun ils raviuls da Trin e secapescha astga era igl agen must buca muncar.

Las stads schetgas ed ils coss dils davos onns han caschunau gronds donns vid la pumera. Numerus pumers ein per part piri ni schizun seccai dil tut. L'uniun mantegna dapi igl onn 2008 puspei il vegl dutg da schuar denter Trin e Digg. Aschia emprov'ins da procurar oravon tut per la pumera giuvna per avunda aua.

Ils 2008 han ins stuiu derscher igl emprem pumer pervia dall malsogna dil fiug bacterial.

L'Uniun per la tgira dalla cuntrada e per la cultivaziun dalla pumera Trin s'engascha per la tgira da quels beins culturals cun la promozion da plontaziuns novas cun pumera da best ault e la cultivaziun da quella pumera sco era per il manteniment da sorts novas e specias tradiziunalas entras enferlar.